

# Powšitkowne WOZJEWJENJA

njedźelu, 4. oktobra 2020

## Duchowna hudźba

W Budyskej tachantskej cyrkwi wotměje so njedźelu, 4. oktobra, we 18.00 hodź., duchowny koncert chórowej hudźby z Budyskim Katolskim tachantskim chórom. Pod cyłkowym nawodom cyrkwinskohudźbného direktora Friedemanna Böhmy zaklinčitej „Magnificat“ Jana Dismasa Zelenki (1679-1745) a „Missa in Es“ Christiana Gottloba Augusta Bergta (1772-1837) ze solistami a orchestrom Serbskeho ludoweho ansambla. Wšitcy su wutrobnje přeprošeni. Zastup na koncert pak budže koronowych předpisow dla jenož z podaćom mjena a telefonoweho čisła móžny.

## Ekumenisku Božu službu ze Smochćic wusyla sćelak MDR originalnje w telewiziji

Zwjazkowy prezident Frank-Walter Steinmeier wobdźěli so njedźelu, 11. oktobra, w 11 hodź. na ekumeniskej Božej službě w Smochćanskim kubłanišću swjateho Bena. Na njej přepoda so najwyšemu mužej Němskeje žnjowa króna. Mjez duchownymi, kotřiž Božu službu swjeća, budže farar Clemens Hrjehor z Budyšina. Hudźbne wobrubjenje změje Serbski ludowy ansambl. Sćelak MDR Božu službu originalnje w telewiziji přenjesje.

## Seminar k přihotej na mandželstwo

Seminar k přihotej na sakrament mandželstwa wotměje so pjatk a sobotu, 27. a 28. nowembra, w Smochćanskim kubłanišću swjateho Bena. Přizjewjenja přijimuju so hač do njedźele, 8. nowembra, jeničce online na internetowej stronje Dekanatneho dušepastyrstwa. Link k wotpowědnemu formularj a k dalšim pokiwam je pod [www.posol.de](http://www.posol.de) podaty.

## Kulturna zyma njebudže

Koronoweje pandemije dla so lětsa a klětu hač do póstneho časa w Chróšćanskej putniskej hospodže žana kulturna zyma njepřewjedže. Kaž putniska mać Monika Gerdesowa zdźěli, njemóže wona w poměrnje wuskej rumnosći za zarjadowanja trěbne hygieniske předpisy spjelnić. Tuž so wona ćežkeje wutroby zjawnych zarjadowanjow w putniskej hospodže wzda. Zdobom pak so Monika Gerdesowa nadźija, zo budže tajke lěto pozdžišo zaso poskićić móc.

## Dalši serbski žarowanski kruh

Žarowanskaj přewodzerjej Regina Krawcowa ze Smječek a Tomaš Pěčka ze Semjan poskićataj znowa serbski žarowanski kruh. Přenje zetkanje budže štwórtk, 5. nowembra, w 17.00 hodź. w Chróšćanskej putniskej hospodže. Zajimcy měli so pola hospicneje služby w Kamjencu pod telefonowym čisłom (0 35 78) 37 43 12 abo pola Reginy Krawcoweje pod čisłom (01 74) 7 01 94 87 přizjewić.

## Marije-Marćiny dom nawjedować

Klášter Marijina hwězda pyta za swój Marije-Marćiny dom za zbrašenych nowu wosobu za jeho nawjedowanje. Městno ma so 1. januara 2021 wobsadzić. Wobšěrne wupisanje z konkretnym profilom dželoweho městna je na internetnej stronje [www.marienstern.de](http://www.marienstern.de). wozjewjene. Zajimcy měli swoje pisomne podložki hač do 15. oktobra w kláštrje zapodać.